

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-2054/21  
Sarajevo, 23.11.2021. godine

**Z A P I S N I K**  
**14. SJEDNICE DOMA NARODA PARLAMENTA FEDERACIJE BOSNE I  
HERCEGOVINE, održane 4.11. i 23.11.2021. godine**

Sjednica je počela sa radom u 12:13 sati.

Sjednicom je predsjedavao Tomislav Martinović, predsjedavajući Doma naroda Parlamenta Federacije Bosne i Hercegovine.

Predsjedavajući je pozdravio prisutne delegate te napomenuo da se i ova sjednica održava pod posebnim epidemiološkim pravilima.

Izostanak sa sjednice su opravdali: Nikica Bosnić, Dragana Damjanović, Slađan Ilić, Zora Dujmović, Marija Rašić, Senad Alić, Alisa Hajdarović i Daliborka Milović.

Prema evidenciji Stručne službe sjednici prisustvuje 41 delegat, što čini većinu, pa Dom naroda može raditi i punovažno odlučivati.

Predsjedavajući je prije prelaska na dnevni red, predložio usvajanje Zapisnika sa 12. i 13. sjednice Doma naroda Parlamenta Federacije BiH.

Predsjedavajući je nakon toga stavio na raspravu Zapisnik sa 12. sjednice Doma naroda.

U raspravi niko nije učestvovao.

Nije bilo primjedbi na Zapisnik.

Na osnovu rezultata glasanja, predsjedavajući je konstatovao da je Dom naroda sa 39 glasova za, bez glasova protiv i bez suzdržanih glasova, usvojio Zapisnik sa 12. sjednice Doma naroda održane 29.7. i 9.9. 2021. godine.

Predsjedavajući je nakon toga stavio na raspravu Zapisnik sa 13. sjednice Doma naroda održane 30.9. i 14.10. 2021. godine.

U raspravi niko nije učestvovao.

Nije bilo primjedbi na Zapisnik.

Na osnovu rezultata glasanja, predsjedavajući je konstatovao da je Dom naroda sa 37 glasova za, bez glasova protiv i 1 suzdržanim glasom usvojio Zapisnik sa 13. sjednice Doma naroda.

Prije utvrđivanja dnevnog reda u skladu sa članom 104. Poslovnika o radu Doma naroda delegati mogu postavljati delegatska pitanja i pokretati inicijative.

**Senad Ahmetović** je pokrenuo inicijativu da Dom naroda donese Zaključak kojim će se pozvati Vlada i Skupština Posavskog kantona da provedu presude Ustavnog suda Federacije BiH i Ustavnog suda Bosne i Hercegovine.

**Ramo Isak** je postavio više pitanja.

Prvo pitanje je postavio ministru unutrašnjih poslova Federacije u vezi imenovanja direktora Federalne uprave policije.

Drugo pitanje je postavio v.d. direktoru Uprave policije u vezi poslova koji su u nadležnosti detašmana Federalne uprave policije u Zenici.

**Zdenka Džambas** je ponovila pitanje u vezi južne interkonekcije i tražila da joj se odgovori da li se počelo sa izradom Prijedloga zakona.

Drugo pitanje je postavila Vladi Federacije u vezi dostavljanja Informacije o svim preduzećima namjenske industrije čiji je većinski vlasnik za posljednje obračunsko razdoblje i tražila dostavljanje podataka o preduzećima koja se bave namjenskom industrijom a u privatnom su vlasništvu.

**Fahrudin Skopljak** je uputio Inicijativu Vladi Federacije BiH, u vezi Uredbe o utvrđivanju kriterija za dodjeljivanje nagrada sportistima za ostvarene vrhunske sportske rezultate na međunarodnim takmičenjima.

**Zvonko Marić** je postavio dva pitanja.

Prvo pitanje je postavio Vladi Federacije BiH u vezi distribucije plina na području Federacije BiH.

Drugo pitanje je također postavio Vladi Federacije BiH šta se podrazumijeva učiniti u vezi protesta zaposlenika namjenske industrije.

**Damir Džeba** je postavio pitanje predsjedniku Vlade Federacije BiH, Fadilu Novaliću u vezi provedbe Odluke Ustavnog suda BiH i usaglašavanja Zakona o grbu i zastavi Federacije s Ustavom BiH.

**Aner Žuljević** je zatražio od Vlade Federacije BiH dostavu informacija koje se tiču aktuelnih društvenih, ekonomskih i političkih dešavanja u Federaciji BiH. Takođe je pokrenuo inicijativu za zamrzavanje cijena goriva kako bi se izbjegla dalja poskupljenja, te da se penzije usklađuju sa indeksom cijena hrane.

**Mirela Trepanić** je uputila Inicijativu Vladi Federacije BiH da se u kalendar imunizacije u formi preporuke uključi dobrovoljno vakcinisanje djevojčica protiv humanog papiloma virusa ili HPV-a.

**Damir Jurišić** je uputio Inicijativu Fondu za profesionalnu rehabilitaciju i zapošljavanje osoba s invaliditetom u vezi osnivanja Područnog fonda Fonda za profesionalnu rehabilitaciju i zapošljavanja osoba s invaliditetom.

**Damir Marjanović** je uputio Inicijativu prema Vladi Federacije BiH, da u što kraćem roku sazove naučno tijelo koje će hitno sačiniti Nacrt Zakona o naučno-istraživačkoj djelatnosti.

**Ilija Ilić** se osvrnuo na delegatsko pitanje Senada Ahmetovića u vezi tražene urgencije prema Skupštini Posavskog kantona za izmjenu i dopunu Ustava Posavske županije, te naglasio da su te izmjene već završene i da će biti prezentirane i date na usvajanju na narednoj sjednici Skupštine 29.11.2021. godine.

**Nijaz Musić** je postavio dva pitanja.

Prvo pitanje se odnosi na inicijativu koju je pokrenuo na 13. sjednici Doma naroda u vezi uvrštavanja u dnevni red Informacije o realizaciji Projekta cestovnog povezivanja Sarajeva sa Goraždem, tj. Izgradnje tunela Hranjen. Napomenuo je da je na istoj sjednici odustao od iste, uz Zaključak da Vlada Federacije BiH za 14. sjednicu dostavi detaljnu Informaciju i da bude prisutan neko od izlagača kako bi se delegati upoznali sa tom Informacijom. Upitao je predsjedavajućeg Doma naroda da li je Vlada Federacije dostavila ovu informaciju.

Drugo pitanje je postavio federalnom ministru unutrašnjih poslova u vezi situacije u Federalnoj upravi policije, neimenovanja direktora iste i situacije sa Odborom nadležnim za upućivanje prijedloga za imenovanje.

**Tomislav Mandić** je postavio pitanje Javnom preduzeću Autoceste Federacije BiH u vezi smjenjivanja Komisije za evaluaciju ponuda u vezi tunela Kvanj.

**Vesna Saradžić** je uputila Inicijativu prema premijeru Vlade Federacije BiH u vezi poduzimanja neophodnih mjera za funkcionisanje rada zdravstvenih ustanova na području općine Konjic.

**Jasmin Duvnjak** je uputio Inicijativu prema Vladi Federacije BiH, odnosno resornom Ministarstvu unutrašnjih poslova u smislu izmjena i dopuna Zakona o policijskim službenicima Federacije BiH, i to u dijelu koji se odnosi na uvjete za sticanje prava na penziju policijskih službenika.

Također je postavio 2 pitanja Poreznoj upravi odnosno Ministarstvu finansija Vlade FBiH.

Prvo pitanje je vezano za rješavanje problema depozitnog računa kod javnih prodaja koje organizuje Porezna uprava FBiH.

Drugo pitanje je vezano za realizaciju odluke za kupovinu poslovnog prostora za ispostavu Porezne uprave za područje Tešnja.

**Marko Saraf** je ponovio delegatsko pitanje na koje nije dobio odgovor.

Pitanje je bilo upućeno Ministarstvu za izbjegla i raseljena lica u vezi realizacije sredstava u poticaju održivog povratka u FBiH. Tim povodom zatražio je da mu se

dostave podaci odnosno rang liste dodjele donacija za obnovu stambenih jedinica u FBiH za 2020. godinu.

**Vibor Handžić** je postavio jedno pitanje Vladi Federacije BiH u vezi Budžeta za 2022. godinu.

Također je uputio dvije Inicijative.

Prva inicijativa se odnosi na uvrštavanje na narednoj sjednici Doma naroda Prostornog plana Federacije BiH 2008.-2028. godina.

Druga inicijativa se odnosi na uvrštavanje na dnevni red naredne sjednice Doma naroda Nacrta zakona o električnoj energiji.

Predsjedavajući je nakon toga predložio delegatima da se pređe na utvrđivanje dnevnog reda.

**Senad Ahmetović** je predložio da se glasa za Zaključak koji je predložen od strane Kluba delegata bošnjačkog naroda a odnosi se na urgenciju prema Posavskom kantonu.

Predsjedavajući je konstatovao da bi se za nešto glasalo, ono mora biti uvršteno u dnevni red.

U raspravi oko ovog prijedloga učestvovali su Goran Broćeta, Ilija Ilić i Zdenka Džambas.

**Vesna Saradžić** je istakla da je na 13. sjednici Doma naroda tražila uvrštavanje dvije tačke u dnevni red.

Prva tačka se odnosi na Informaciju koju je Vlada Federacije BiH bila dužna dostaviti Domu naroda vezano za usvojeni Zaključak od 29.7.2021. godine, a kojim se Vlada FBiH zadužuje da se aktivno uključi u zaštitu entiteta Federacije BiH od posljedica izgradnje hidroelektrane Ulog.

Druga tačka se odnosila na Nacrt zakona o dopuni Zakona o električnoj energiji.

Predsjedavajući je nakon kratkih konsultacija sa predsjednicima klubova, odnosno članovima Kolegija, saopštio delegatima da je dogovoreno da Klub delegata bošnjačkog naroda uputiti urgenciju prema Skupštini Posavskog kantona.

Vlada Federacije BiH je dostavila Prijedlog zakona o izmjenama i dopunama Zakona o radu i Prijedlog Zakona o dopunama Zakona o Vijeću uposlenika s prijedlogom da se razmatraju po hitnom postupku.

Predsjedavajući je saopštio delegatima da je, s obzirom da je Predstavnički dom Parlamenta Federacije BiH ova dva zakona razmatrao u formi Nacrta, prijedlog Kolegija Doma naroda da se ovi zakoni također razmatraju u formi Nacrta.

Na osnovu rezultata glasanja, predsjedavajući je konstatovao da je Prijedlog Kolegija Doma naroda da se Prijedlog zakona o izmjenama i dopunama Zakona o radu razmatra u formi Nacrta prihvaćen sa 35 glasova za, bez glasova protiv i bez suzdržanih.

Predsjedavajući je nakon toga stavio na glasanje Prijedlog Kolegija Doma naroda da se Prijedlog Zakona o dopunama Zakona o Vijeću uposlenika razmatra u formi Nacrta zakona.

Na osnovu rezultata glasanja, predsjedavajući je konstatovao da je i ovaj prijedlog dobio potrebnu većinu sa 37 glasova za, bez glasova protiv i bez suzdržanih glasova.

Vlada Federacije BiH je dostavila Prijedlog Zakona o izmjenama i dopunama Zakona o Jedinostvenom sistemu registracije, kontrole i naplate doprinosa s prijedlogom da se razmatra po skraćenom postupku.

Predsjedavajući je pozvao delegate da se na osnovu člana 164. Poslovnika o radu izjasne o tome da li će se ovaj Zakon razmatrati po skraćenom postupku.

Na osnovu rezultata glasanja, predsjedavajući je konstatovao da je ovaj prijedlog dobio potrebnu većinu sa 35 glasova za, bez glasova protiv i bez suzdržanih.

Delegat u Domu naroda Parlamenta Federacije BiH, Jasmin Duvnjak, podnio je Prijedlog zakona o dopuni Zakona o prostornom planiranju i korištenju zemljišta na nivou Federacije BiH s prijedlogom da se razmatra po skraćenom postupku.

Predsjedavajući je potom stavio na glasanje prijedlog da se ovaj Prijedlog zakona razmatra po skraćenom postupku.

Na osnovu rezultata glasanja, predsjedavajući je konstatovao da je Dom naroda sa 34 glasa za, bez glasova protiv i bez suzdržanih, prihvatio prijedlog da se Prijedlog zakona o dopuni Zakona o prostornom planiranju i korištenju zemljišta na nivou Federacije BiH razmatra po skraćenom postupku.

Predsjedavajući je nakon toga za sjednicu predložio sljedeći

## D N E V N I R E D

1. Odluka Ustavnog suda Bosne i Hercegovine , broj: U - 7/21 od 23.9.2021. godine,
2. a) Informacija o epidemiološkoj situaciji COVID-19 u Federaciji Bosne i Hercegovine na dan 09.8.2021. s prijedlogom naredbi i preporuka Kriznog štaba Federalnog ministarstva zdravstva,  
b) Informacija o epidemiološkoj situaciji COVID-19 u Federaciji Bosne i Hercegovine na dan 23.8.2021. s prijedlogom naredbi i preporuka Kriznog štaba Federalnog ministarstva zdravstva,  
c) Informacija o epidemiološkoj situaciji COVID-19 u Federaciji Bosne i Hercegovine na dan 20.9.2021. s prijedlogom naredbi i preporuka Kriznog štaba Federalnog ministarstva zdravstva,
3. Prijedlog zakona o izmjenama i dopuni Zakona o Jedinostvenom sistemu registracije, kontrole i naplate doprinosa – skraćeni postupak,
4. Prijedlog zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine - (predlagač: Jasmin Duvnjak, delegat u Domu naroda) skraćeni postupak,

5. Prijedlog zakona o reprezentativnosti sindikata i udruženja poslodavaca,
6. Nacrt zakona o ustanovama socijalne zaštite Federacije Bosne i Hercegovine,
7. Nacrt zakona o izmjenama i dopunama Zakona o radu,
8. Nacrt zakona o dopunama Zakona o Vijeću zaposlenika,
  
9. Prijedlog odluke o usvajanju Programa razvoja zaštite i spašavanja ljudi i materijalnih dobara od prirodnih nesreća u Federaciji BiH od 2018. do 2025. godine,
  
10. Prijedlog odluke o pristupanju izradi Regulacionog plana historijskog urbanog krajolika Mostara,
  
11. Prijedlog odluke o pristupanju izradi izmjena i dopuna Regulacionog plana sanacije, konzervacije, restauracije i revitalizacije Sarajevske čaršije,
  
12. Prijedlog odluke o usvajanju Strategije zapošljavanja u Federaciji Bosne i Hercegovine (2021.-2027.),
  
13. Prijedlog zaključka o utvrđivanju Programa provođenja statističkih istraživanja od interesa za Federaciju Bosne i Hercegovine za period 2021 – 2024. godina,
  
14. Strategija upravljanja dugom 2020 - 2022. godina,
  
15. Prijedlog Odluke o izmjeni odluke o izboru članova u Parlamentarnu komisiju odgovornu za reviziju.

Na osnovu rezultata glasanja, predsjedavajući je konstatovao da je Dom naroda Parlamenta Federacije BiH sa 36 glasova za, bez glasova protiv i bez suzdržanih glasova usvojio predloženi dnevni red.

#### **1. Odluka Ustavnog suda Bosne i Hercegovine, broj: U - 7/21 od 23.9.2021. godine,**

Ustavni sud Federacije BiH je dostavio Parlamentu Federacije BiH Odluku Ustavnog suda BiH broj: U-7/21 od 23.9.2021. godine.

Odluka je dostavljena nadležnim radnim tijelima i delegatima.

U raspravi su učestvovali Aner Žuljević i Ilija Nakić.

Na osnovu rezultata glasanja, predsjedavajući je konstatovao da je Dom naroda sa 33 glasa za i 1 suzdržanim glasom usvojio sljedeći:

### **Z A K L J U Č A K**

Zadužuje se premijer Federacije Bosne i Hercegovine da, u skladu sa obavezama iz Ustava Federacije Bosne i Hercegovine, osigura izvršenje Odluke Ustavnog suda Bosne i Hercegovine broj: U-7/21 od 23.9.2021. godine.

2. a) **Informacija o epidemiološkoj situaciji COVID-19 u Federaciji Bosne i Hercegovine na dan 09.8.2021. s prijedlogom naredbi i preporuka Kriznog štaba Federalnog ministarstva zdravstva,**
- b) **Informacija o epidemiološkoj situaciji COVID-19 u Federaciji Bosne i Hercegovine na dan 23.8.2021. s prijedlogom naredbi i preporuka Kriznog štaba Federalnog ministarstva zdravstva,**
- c) **Informacija o epidemiološkoj situaciji COVID-19 u Federaciji Bosne i Hercegovine na dan 20.9.2021. s prijedlogom naredbi i preporuka Kriznog štaba Federalnog ministarstva zdravstva,**

Informacije je obrazložila Mia Blažević, predstavnik Federalnog ministarstva zdravstva.

U raspravi su učestvovali Aner Žuljević, Damir Marjanović, Zvonko Marić, Ivo Tadić, Mia Blažević, Snježana Bodnaruk, Senad Ahmetović i Tomislav Martinović.

Predsjedavajući je konstatovao da je Dom naroda primio k znanju Informacije o epidemiološkoj situaciji na dan 9.8., 23.8. i 20.9.2021. godine s prijedlogom naredbi i preporuka Kriznog štaba Federalnog ministarstva zdravstva.

### **3. Prijedlog zakona o izmjenama i dopuni Zakona o Jedinostvenom sistemu registracije, kontrole i naplate doprinosa – skraćeni postupak,**

Predstavnički dom je obavijestio Dom naroda da je na svojoj 23. sjednici održanoj 5.7.2021. godine usvojio Prijedlog zakona o izmjenama i dopuni Zakona o Jedinostvenom sistemu registracije, kontrole i naplate doprinosa u tekstu kako ga je predložila Vlada FBiH.

Nadležna radna tijela su također razmatrala ovaj Prijedlog zakona.

Prijedlog zakona obrazložila je Esmā Jahić, predstavnik Federalnog ministarstva finansija.

U raspravi je učestvovao Aner Žuljević koji je predložio donošenje Zaključka.

Na osnovu rezultata glasanja, predsjedavajući je konstatovao da je Prijedlog zakona o izmjenama i dopuni Zakona o Jedinostvenom sistemu registracije, kontrole i naplate doprinosa dobio potrebnu većinu sa 35 glasova za, bez glasova protiv i bez suzdržanih glasova.

Aner Žuljević je nakon toga pročitao Prijedlog Zaključka.

Predsjedavajući je konstatovao da je sa 35 glasova za, bez glasova protiv i bez suzdržanih glasova dobio potrebnu većinu sljedeći:

## ZAKLJUČAK

Dom naroda poziva Vladu Federacije BiH da u skladu sa važećim zakonskim propisima kroz instrukciju nadležnim institucijama osigura ravnopravan status svih uplatitelja doprinosa vezanih za korištenje prava iz Zakona o PIO i Zakona o zdravstvenom osiguranju.

### **4. Prijedlog zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine - (predlagač: Jasmin Duvnjak, delegat u Domu naroda) skraćeni postupak**

Predstavnički dom je obavijestio Dom naroda da je na svojoj 24. sjednici održanoj 27.7.2021. godine usvojio Prijedlog zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine sa jednim amandmanom predlagača Adnana Efendića, poslanika u Predstavničkom domu koji je postao sastavni dio Prijedloga zakona.

Tekst Prijedloga zakona delegata Jasmina Duvnjaka je istovjetan Prijedlogu zakona koji je podnio Adnan Efendić, poslanik u Predstavničkom domu.

Prijedlog zakona obrazložio je Jasmin Duvnjak, predlagač ovog zakona.

U raspravi je učestvovao Goran Broćeta.

Na osnovu rezultata glasanja, predsjedavajući je konstatovao da je Prijedlog zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine dobio potrebnu većinu sa 33 glasa za, bez glasova protiv i bez suzdržanih glasova.

### **5. Prijedlog zakona o reprezentativnosti sindikata i udruženja poslodavaca**

Tekst Prijedloga zakona utvrdila je Vlada Federacije BiH.

Predstavnički dom je obavijestio Dom naroda da je na 24. sjednici održanoj 27.7.2021. godine usvojio Prijedlog zakona o reprezentativnosti sindikata i udruženja poslodavaca sa jednim amandmanom kojeg Vlada FBiH nije prihvatila, ali ga je Predstavnički dom izglasao. Amandman se odnosi na član 7. Prijedloga zakona.

Prijedlog zakona obrazložio je Vesko Drljača, federalni ministar rada i socijalne politike.

U raspravi niko nije učestvovao.

S obzirom da se na sjednici Predstavničkog doma našao i Amandman na član 7. koji Vlada Federacije BiH nije prihvatila, Predstavnički dom je izglasao ovaj amandman i shodno tome, Dom naroda ima obavezu da se izjasni o ovom amandmanu.

Na osnovu rezultata glasanja, predsjedavajući je konstatovao da ovaj amandman nije dobio potrebnu većinu, jer je za glasalo 14 delegata, a 17 ih je bilo suzdržano.

Nakon toga, predsjedavajući je stavio na glasanje Prijedlog zakona o reprezentativnosti sindikata i udruženja poslodavaca.

Na osnovu rezultata glasanja, predsjedavajući je konstatovao da je Prijedlog zakona o reprezentativnosti sindikata i udruženja poslodavaca dobio potrebnu većinu, sa 36 glasova za, bez glasova protiv i bez suzdržanih glasova.

Prema tome potrebno je da se Predstavnički dom izjasni o tekstu Prijedloga zakona kako ga je usvojio Dom naroda.

## **6. Nacrt zakona o ustanovama socijalne zaštite Federacije Bosne i Hercegovine**

Nacrt zakona utvrdila je Vlada Federacije BiH.

Predstavnički dom obavijestio je Dom naroda da je na 22. sjednici, održanoj 26.5.2021. godine prihvatio Nacrt zakona.

Zakon su razmatrala i nadležna radna tijela.

Nacrt zakona obrazložio je Vesko Drljača, federalni ministar rada i socijalne politike.

U raspravi su učestvovali Segmedina Srna-Bajramović, Damir Džeba i Jasmin Duvnjak.

Predsjedavajući je nakon toga stavio na glasanje sljedeći:

## **ZAKLJUČAK**

1. Dom naroda Parlamenta Federacije Bosne i Hercegovine prihvata Nacrt zakona o ustanovama socijalne zaštite Federacije Bosne i Hercegovine i smatra da može poslužiti kao osnov za izradu Prijedloga zakona.
2. Zadužuje se predlagač da organizira i sprovede javnu raspravu u trajanju od 60 dana u skladu sa procedurama predviđenim u Ustavu Federacije za donošenje zakona iz zajedničke nadležnosti federalne vlasti i kantona.
3. Zadužuje se Stručna služba Doma naroda Parlamenta Federacije Bosne i Hercegovine da ovaj zaključak i Nacrt zakona o ustanovama socijalne zaštite Federacije Bosne i Hercegovine dostavi kantonalnim skupštinama radi davanja mišljenja u roku od 60 dana od dana dostave ovog zaključka.

4. Zadužuje se predlagač da, prilikom izrade Prijedloga zakona, ima u vidu primjedbe, prijedloge i sugestije iznesene na sjednici Doma naroda, mišljenja kantonalnih skupština i mišljenja iznesena u javnoj raspravi.

Na osnovu rezultata glasanja, predsjedavajući je konstatovao da je ovaj Zaključak prihvaćen sa 37 glasova za, bez glasova protiv i bez suzdržanih glasova.

## **7. Nacrt zakona o izmjenama i dopunama Zakona o radu**

Tekst zakona utvrdila je Vlada Federacije BiH.

Predstavnički dom obavijestio je Dom naroda da je na 19. sjednici, održanoj 24.2.2021. godine, prihvatio da ovaj zakon razmatra u formi Nacrta, i Zaključkom ga prihvatio.

Nacrt zakona su razmatrala i nadležna radna tijela i dostavila svoje izvještaje.

Nacrt zakona obrazložio je Vesko Drljača, federalni ministar rada i socijalne politike.

U raspravi su učestvovali Aner Žuljević, Vibor Handžić, Žarko Vujović, Zdenka Džambas, Boris Krešić, Zvonko Marić i Senad Ahmetović.

Predsjedavajući je stavio na glasanje sljedeći:

### **ZAKLJUČAK**

1. Dom naroda prihvata Nacrt zakona o izmjenama i dopunama Zakona o radu i smatra da može poslužiti kao osnov za izradu Prijedloga zakona.
2. Zadužuje se predlagač da organizira i sprovede javnu raspravu u trajanju od 90 dana u skladu sa procedurama predviđenim Ustavom Federacije BiH do donošenja Zakona i zajedničke nadležnosti Federalnoj vlasti kantona.
3. Zadužuje se Stručna služba Doma naroda Parlamenta Federacije BiH da ovaj Zaključak i Nacrt Zakona o izmjenama i dopunama Zakona o radu dostavi Kantonalnim skupštinama na davanje mišljenja u roku od 90 dana od dostave ovog Zaključka.
4. Zadužuje se predlagač da prilikom izrade Prijedloga zakona ima u vidu primjedbe, prijedloge i sugestije iznesena na sjednici Doma naroda, mišljenje kantonalne skupštine i mišljenje delegata u javnoj raspravi.

Na osnovu rezultata glasanja, predsjedavajući je konstatovao da ovaj Zaključak nije dobio potrebnu većinu, sa 29 glasova za, 6 glasova protiv i 1 suzdržanim glasom.

## **8. Nacrt zakona o dopunama Zakona o Vijeću zaposlenika**

Nacrt zakona je utvrdila Vlada Federacije BiH.

Predstavnički dom Parlamenta Federacije BiH obavijestio je Dom naroda da je prihvatio prijedlog resornog ministra odnosno Vlade FBiH da se Prijedlog zakona o

dopunama Zakona o Vijeću zaposlenika ne razmatra po hitnom postupku, nego je on također u Predstavničkom domu razmatran u formi Nacrta i prihvaćen Zaključkom.

Nacrt zakona razmatrala su i nadležna radna tijela i dostavila svoje izvještaje.

Nacrt zakona obrazložio je Vesko Drljača, federalni ministar rada i socijalne politike.

U raspravi je učestvovao Boris Krešić.

Na osnovu rezultata glasanja predsjedavajući je konstatovao da Dom naroda sa 2 glasa za, 7 glasova protiv i 22 suzdržana glasa nije prihvatio sljedeći:

### ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o dopuni Zakona o Vijeću zaposlenika i smatra da može poslužiti kao osnov za izradu Prijedloga zakona.
2. Zadužuje se predlagač da organizira i sprovede javnu raspravu u trajanju od 90 dana u skladu sa procedurama predviđenim u Ustavu Federacije za donošenje zakona iz zajedničke nadležnosti federalne vlasti i kantona.
3. Zadužuje se Stručna služba Doma naroda Parlamenta Federacije Bosne i Hercegovine da ovaj Zaključak i Nacrt zakona o izmjenama i dopunama Zakona o radu dostavi kantonalnim skupštinama radi davanja mišljenja u roku od 90 dana od dana dostave ovog Zaključka.
4. Zadužuje se predlagač da, prilikom izrade Prijedloga zakona, ima u vidu primjedbe, prijedloge i sugestije iznesene na sjednici Doma naroda, mišljenja kantonalnih skupština i mišljenja iznesena u javnoj raspravi.

#### **9. Prijedlog odluke o usvajanju Programa razvoja zaštite i spašavanja ljudi i materijalnih dobara od prirodnih nesreća u Federaciji BiH od 2018. do 2025. godine,**

Vlada Federacije BiH dostavila je Parlamentu Federacije BiH Prijedlog odluke o usvajanju Programa razvoja zaštite i spašavanja ljudi i materijalnih dobara od prirodnih nesreća u Federaciji BiH od 2018. do 2025. godine, radi razmatranja i usvajanja.

Predstavnički dom Parlamenta Federacije BiH obavijestio je Dom naroda da je na 25. sjednici, održanoj 27.9.2021. godine prilikom razmatranja razvoja zaštite i spašavanja ljudi i materijalnih dobara od prirodnih nesreća u Federaciji BiH od 2018. do 2025. godine, predstavnik Vlade FBiH prihvatio primjedbu poslanika da se u nazivu Programa brojevi 2018.-2025. zamijene brojevima 2021.-2028.godine.

Prijedlog odluke su razmatrala nadležna radna tijela.

Prijedlog odluke je obrazložio predstavnik Federalne uprave civilne zaštite.

U raspravi su učestvovali Aner Žuljević i Zdenka Džambas.

Predsjedavajući je nakon toga saopštio delegatima da se može prihvatiti taj prijedlog da dokument datira od 2021.-2028. godine i da se delegati ne moraju pojedinačno izjašnjavati o tom prijedlogu.

Predsjedavajući je nakon toga stavio na glasanje sljedeći Prijedlog Odluke:

- 1.) Ovom odlukom usvaja se Program razvoja zaštite i spašavanja ljudi i materijalnih dobara od prirodnih i drugih nesreća u Federaciji BiH od 2021. – 2028. godine.
- 2.) Sastavni dio ove odluke čini Program razvoja zaštite i spašavanja ljudi i materijalnih dobara od prirodnih i drugih nesreća u FBiH od 2021.-2028. godine.
- 3.) Ova odluka stupa na snagu narednog dana od dana objavljivanja u „Službenim novnama FBiH“.

Na osnovu rezultata glasanja predsjedavajući je konstatovao da je Odluka o usvajanju Programa razvoja zaštite i spašavanja ljudi i materijalnih dobara od prirodnih nesreća u Federaciji BiH od 2021. do 2028. godine prihvaćena sa 32 glasa za, bez glasova protiv i bez suzdržanih glasova.

#### **10. Prijedlog odluke o pristupanju izradi Regulacionog plana historijskog urbanog krajolika Mostara,**

Vlada FBiH dostavila je Parlamentu FBiH Prijedlog odluke o pristupanju izradi Regulacionog plana historijskog urbanog krajolika Mostara.

Prijedlog odluke su razmatrala i nadležna radna tijela.

U raspravi niko nije učestvovao.

Na osnovu rezultata glasanja, predsjedavajući je konstatovao da je Prijedlog odluke o pristupanju izradi Regulacionog plana historijskog urbanog krajolika Mostara dobio potrebnu većinu sa 30 glasova za, bez glasova protiv i bez suzdržanih glasova.

Predsjedavajući je nakon toga zamolio za 5 minuta pauze za kratke konsultacije sa predsjednicima klubova.

Nakon kratke pauze, predsjedavajući je konstatovao da je Prijedlog Kolegija da se zastane sa radom sjednice, i u neko skorije vrijeme nastavi.

Sjednica je prekinula sa radom u 16 sati i 44 minute.

\*\*\*

**Nastavak sjednice od 23.11.2021. godine**

Sjednica je počela sa radom u 13:47 sati.

Sjednicom je predsjedavao Tomislav Martinović, predsjedavajući Doma naroda.

Izostanak sa nastavka 14. sjednice su najavili sljedeći delegati: Nikica Bosnić, Dragana Damjanović, Alisa Hajdarović, Senad Ahmetović, Rasim Kantarević, Tomislav Mandić, Marija Rašić, Goran Broćeta i Aleksandar Štrbac.

Prema evidenciji Stručne službe sjednici prisustvuje 32 delegata što čini većinu, pa Dom naroda može raditi i punovažno odlučivati.

Za nastavak sjednice preostale su sljedeće tačke dnevnog reda:

11. Prijedlog odluke o pristupanju izradi izmjena i dopuna Regulacionog plana sanacije, konzervacije, restauracije i revitalizacije Sarajevske čaršije,
12. Prijedlog odluke o usvajanju Strategije zapošljavanja u Federaciji Bosne i Hercegovine (2021.-2027.),
13. Prijedlog zaključka o utvrđivanju Programa provođenja statističkih istraživanja od interesa za Federaciju Bosne i Hercegovine za period 2021 – 2024. godina,
14. Strategija upravljanja dugom 2020 - 2022. godina,
15. Prijedlog Odluke o izmjeni odluke o izboru članova u Parlamentarnu komisiju odgovornu za reviziju.

#### **11. Prijedlog odluke o pristupanju izradi izmjena i dopuna Regulacionog plana sanacije, konzervacije, restauracije i revitalizacije Sarajevske čaršije,**

Tekst Odluke utvrdila je Vlada Federacije BiH i dostavila ga Parlamentu Federacije

BiH radi razmatranja i donošenja.

Predstavnički dom obavijestio je Dom naroda da je usvojio Odluku o pristupanju izradi izmjena i dopuna Regulacionog plana sanacije, konzervacije, restauracije i revitalizacije Sarajevske čaršije.

Prijedlog odluke su razmatrala nadležna radna tijela.

Prijedlog odluke je obrazložila Hanka Mušinbegović, pomoćnica Federalnog ministra Prostornog uređenja.

Dževad Hadžić je predložio da se, ako je to moguće, razmotri trenutna situacija sa rudarima i njihovim zahtjevima.

U raspravi niko nije učestvovao.

Na osnovu rezultata glasanja, predsjedavajući je konstatovao da je Dom naroda sa 37 glasova za, bez glasova protiv i bez glasova suzdržanih usvojio Odluku o

pristupanju izradi izmjena i dopuna Regulacionog plana sanacije, konzervacije, restauracije i revitalizacije Sarajevske čaršije.

## **12. Prijedlog odluke o usvajanju Strategije zapošljavanja u Federaciji Bosne i Hercegovine (2021.-2027.),**

Vlada Federacije BiH dostavila je Parlamentu Federacije BiH Prijedlog odluke o usvajanju Strategije zapošljavanja u Federaciji Bosne i Hercegovine (2021.- 2027.), radi razmatranja i donošenja.

Predstavnički dom obavijestio je Dom naroda da je na 25. sjednici, održanoj 27.9.2021. godine, donio Odluku o usvajanju Strategije zapošljavanja u Federaciji BiH.

Prijedlog odluke su razmatrala nadležna radna tijela i dostavila svoje izvještaje.

Prijedlog odluke obrazložio je Vesko Drljača, federalni ministar rada i socijalne politike.

U raspravi su učestvovali Aner Žuljević i Vesko Drljača.

Na osnovu rezultata glasanja, predsjedavajući je konstatovao da Dom naroda nije prihvatio Prijedlog odluke o usvajanju Strategije zapošljavanja u Federaciji Bosne i Hercegovine (2021.-2027.), jer je za glasalo 23 delegata, 9 ih je bilo protiv i 2 su bila suzdržana.

## **13. Prijedlog zaključka o utvrđivanju Programa provođenja statističkih istraživanja od interesa za Federaciju Bosne i Hercegovine za period 2021. - 2024. godina,**

Vlada Federacije BiH dostavila je Parlamentu Federacije BiH Prijedlog zaključka o utvrđivanju Programa provođenja statističkih istraživanja od interesa za Federaciju Bosne i Hercegovine za period 2021. - 2024. godina, radi razmatranja i donošenja.

Predstavnički dom obavijestio je Dom naroda da je na 18. sjednici, održanoj 2.2.2021. godine, usvojio Zaključak o utvrđivanju Programa provođenja statističkih istraživanja od interesa za Federaciju Bosne i Hercegovine za period 2021. - 2024. godina.

Prijedlog zaključka razmatrala su nadležna radna tijela i dostavila svoje izvještaje.

Prijedlog zaključka obrazložio je Emir Kremić, direktor federalnog Zavoda za statistiku.

Na osnovu rezultata glasanja, predsjedavajući je konstatovao da je Dom naroda sa 32 glasa za, bez glasova protiv i bez suzdržanih, prihvatio Prijedlog zaključka o utvrđivanju Programa provođenja statističkih istraživanja od interesa za Federaciju Bosne i Hercegovine za period 2021. - 2024. godina.

#### **14. Strategija upravljanja dugom 2020. - 2022. godina,**

Vlada Federacije BiH dostavila je Parlamentu Federacije BiH, radi informisanja, Strategiju upravljanja dugom od 2020. do 2022. godine.

Strategiju su razmatrala nadležna radna tijela i dostavila svoje izvještaje. Strategiju je obrazložila Tonka Kozarić, stručni savjetnik u Sektoru za dug Federalnog ministarstva finansija.

U raspravi je učestvovao Aner Žuljević.

S obzirom da se radi o materijalu koji je dostavljen Parlamentu Federacije BiH radi informisanja, predsjedavajući je konstatovao da je Dom naroda Parlamenta Federacije BiH primio k znanju Strategiju upravljanja dugom 2020. - 2022. godina.

#### **15. Prijedlog Odluke o izmjeni odluke o izboru članova u Parlamentarnu komisiju odgovornu za reviziju**

Prijedlog Odluke utvrdile su Komisije za izbor i imenovanja oba doma Parlamenta Federacije BiH.

Predstavnički dom obavijestio je Dom naroda da je na 24. sjednici, održanoj 27.7.2021. godine, donio Odluku o izmjeni odluke o izboru članova u Parlamentarnu komisiju odgovornu za reviziju.

Iz Predstavničkog doma na mjesto člana razrješava se Adis Arapović, a umjesto njega bira se novi član, Mirsad Kacila.

U raspravi niko nije učestvovao.

Na osnovu rezultata glasanja, predsjedavajući je konstatovao da je sa 31 glasom za, bez glasova protiv i bez suzdržanih Dom naroda usvojio sljedeći Prijedlog Odluke:

1. U tački 1. Odluke o izboru članova u Parlamentarnu komisiju odgovornu za reviziju ispred Predstavničkog doma na mjesto člana razrješava se Adis Arapović, a umjesto njega bira se novi član Mirsad Kacila.
2. Odluka stupa na snagu danom donošenja i bit će objavljena u Službenim novinama Federacije BiH.

Sjednica je završila s radom u 14:38 sati.

\*\*\*

Transkript sjednice čini sastavni dio Zapisnika.

SEKRETAR  
Izmir Hadžić

PREDSJEDAVAJUĆI  
Tomislav Martinović